

I mea taugagana e aunoa Niu Sila ma se fa'aaliga

E iai se fagogo uiga ese lava i se tamaloa mativa sa nofo i lona fanua, ma lona le iloaina o lalo ifo i le manava o le palapala o loo iai se faupu'ega o maataua e faitau piliona lona tau i tupe. Ana se mea e iloa e le tamaloa, na te le faatauina lona fanua i se faipisinisi i le na o se sefulu pauni.

Meamanu! E iai se loia alofa na ia iloa le mea ua tupu, ona faaulu lea o lana talosaga i le faamasinoga e finauina ai le faiga le tonu na ia matauina i lenei faatau. E faapea lana finau. Na iloa lelei e le faipisinisi le mea e le o iloa e le tamaloa mativa, o loo iai se oloa tele i le fanua, a ua ia faatogafiti ona fai le maliega ma ia ave ai le fanua i se tau sili lona taugofie. O le i'uga o le tala e fiafia, auā na toe faafo'i le fanua o le tamaloa mativa, ae toe avane i le faipisinisi lana sefulu pauni.

E 160 gagana o loo feganavai ai tagata i totonu o laueleele ua faaigoa ia Aotearoa. Ua avea ai Niu Sila ma se tasi o malo pito tamaoaiga i le vao gagana, e le taumate o le tasi i le 20 atunuu pito i luga. Ae faapei o le tamaloa mativa e saofa'i i luga o le faupu'ega o maataua, na te le iloaina. E le iloa e faigamalo a Niu Sila le aogā o gagana—pe faapea fo'i, latou te le iloa pe o le a se mea e fai i lenei tamaoaiga. Pe faapea fo'i, latou te le iloa atu le pupula o le auro i mata'itusi o nisi gagana.

O se lape faalepulega malo ua leva. A o se mea e ofo ai pe a manatu i le to'atele o ta'ita'i popoto o pati faaupufa'i a Niu Sila latou te le iloaina—pe ua iloa fo'i ae 'augata ona o le tau e totogi.

Fai mai le molimau a Sir Maarten Wevers, o lē sa taiulu i le matagaluega a le Palemia ma le Kapeneta, e leai ma se tapenaga a le malo Niu Sila mo le lumana'i i le itu taugagana e faatusatusa ia Peretania ma isi. Na mafua le taofi o Sir Maarten ona o le pepa a le Royal Society a Niu Sila e faatatau tonu i le mataupu. I lea pepa na vala'au ai le Sosaiete fa'aaloaloga i le malo o le tatau ona tusi se polisī o gagana a Niu Sila, e pei ona faia e le tele o malo o le lalolagi. E manatu Sir Maarten, ua sili i luma Ausetalia i lenei lava taimi, a o sagai atu lona malo e faamalosia le a'oa'oina o isi gagana i totonu o potua'oga a le atunuu. I Ausetalia ua iai nei le fuafuaga a le malo e a'o le Mandarin e le fanau a'oga mai lava i le tulagalua e aulia le kolisi. Ua atoa nei le 20 tausaga talu ona tusi le anava o gagana a lea atunuu. I Peretania e faamalosia le a'oina o se gagana lona lua i le kolisi. O loo talanoa le malo o Cameron pe le ua tatau loa ona amata mai lalo i le tulagalua lea faiga. I Suetena ua pasia nei e le malo le a'oina o le Mandarin i a'oga uma e amata i le tausaga e 2020.

I Niu Sila nei e leai se anava (polisī) o gagana. E le o se mea e toe natia, e mafua ona 'alo le a'oa'oina o isi gagana i potua'oga ona o le tau e totogi. Ae i le su'esu'ega na ta'ua e Sir Maarten, na ia aumai ai Peretania o se ata faata'ita'i. I le su'esu'ega e faamaonia ai e moni e iai le tau peita'i e faaleiloga. O le isi itu e le i iloga ona tilofia o le fa'aaogaga o le tekonolosi fa'aaso nei e tali atu ai i le popolega. E manatu ai e le so'ona taugata le faatinoga e pei ona atu i ai nisi.

Peita'i e le faatusalia le tau ma le tau e fua mai ai i le i'uga. Faapea mai le su'esu'ega e \$18 piliona e tataua ona maua e Peretania i tausaga ta'itasi, ae mafua ona le maua ona o faafitauli tau fesoota'iga i gagana. A o aga'i le faamuamua a malo malolosi i le a'oina o gagana e pei o le Mandarin a Saina, ae ofo i le le faatauaina o lenei e le malo o Niu Sila, faapea mai Sir Maarten.

O Saina o le faupu'ega oloa a le lalolagi i nei tupulaga. E faitau selau miliona o loo nonō ai Niu Sila ia Saina i vaiaso ta'itasi. Ae a saili pe fia ni a'oga a Niu Sila o loo a'oina lea gagana e laki pe a atoa se 10. O se mea e faigata ona malamalama ai, i se ta'ita'i e pese i le taua o sootaga fefaataua'i ma malo Asia, ae le taua se tapenaga tuutuu mamao i le mea sili ona taua: fesoota'iga faalevaitagata ma isi ia latou lava gagana. Atonu pe maua le tali o le fesili i le eseese o ta'ita'i e to'alua.

O Key na soifua a'e i Kalaietete i se ata faalesosaiete e nonō sa'o mai i Egelani pa'epa'e, a o Shearer na tupu a'e i Papatoetoe i le sone ua ta'ua o Aukilani Enaena. Ua leva ona galue i malo Aferika ma masani i le taua o gagana o ni auala fesoota'i i le atina'e ma le auiluma. O Key sa faipisinisi, o se milionea, o se faipule e lagolago e se itumalo palota e fulisia i le lanu pa'epa'e. Ua foa lona ala i le papa o le talafaasolo e ala i tomai tautupe i taimi a o tasi le gagana. Ailoga e maumuina sana moe i le fesili pe taua se isi gagana!

I le 1992 na saunia ai e le Leipa se pepa e faatalanoaina ai le mataupu i se faiga faavae. Ae na lafoa'i e le malo a le National na sosoo mai ai. O le tali a le minisita o A'oga, Hekia Parata, ina ua sailia sona finagalo, e leai se fuafuaga faatelevave a le malo e sui nisi faiga. La lea ua manino le tulaga o le malo i le mataupu; o se mataupu e le faatelevave lona sola pe galoma ona o le agaga musuā o se minisita ma se faigamalo. A o se mataupu ua tataua loa i le Leipa ona apo o se fa'aaliga paia mai o tatou tagata.

Faasoa a le OLA Fepuari 2013